

***Obraćanje dr. Zlatka Lagumdžije  
zamjenika Predsjedavajućeg Vijeća ministara i ministra vanjskih poslova Bosne i  
Hercegovine na Konferenciji povodom obilježavanja pete godišnjice rada RCC-a u  
Sarajevu  
Sarajevo, 27. februara 2013. godine***

Poštovani Generalni sekretaru,  
Poštovane kolege ministri  
Vaše ekscelencije,  
Dame i gospodo

Na početku obraćanja želim da vas pozdravim i da Vijeću za regionalnu saradnju čestitam petu godišnjicu rada i djelovanja ove značajne regionalne inicijative u BiH. Također bih želio izraziti srdačnu dobrodošlicu novoimenovanom generalnom sekretaru Vijeća za regionalnu saradnju, g-dinu Goranu Svilanoviću i poželiti mu uspjeh u daljem radu. Istovremeno, želim se zahvaliti na posvećenosti i posebno dobrom i aktivnom pristupu prvog generalnog sekretara, g-dina Hide Bišćevića.

Razvijanje regionalne saradnje u jugoistočnoj Evropi u različitim oblastima sa ciljem da zemlje regiona pojedinačno i region kao cjelina distignu standarde neophodne za integraciju u evropske i euro-atlanske strukture je svakako zacrtani i dobro ostvarivan cilj rada RCC.

Regionalna saradnja je ključni faktor za integraciju zapadnobalkanskih zemalja u Evropsku uniju. Regionalna saradnja je od suštinskog značaja za ekonomski razvoj zapadnobalkanskih zemalja i u tom pravcu bi trebalo usmjeriti pažnju u budućnosti.

Iako je tokom posljednjih godina pokrenuto više regionalnih inicijativa u jugoistočnoj Evropi i u mnogima oblastima ostvareni konkretni rezultati i dalje se nailazi na znatan skepticizam ili negativne ocjene regionalne saradnje koji se najčešće zasnivaju na predarsudama, pogrešnim predstavama ili prosto na nedovoljnom poznavanju samog procesa. Regionalna integracija je imperativ, posebno za male zemlje koje preovlađuju u regionu, pošto one moraju rješavati mnoge probleme putem međunarodne, evropske ili regionalne saradnje. Perspektiva evropske integracije kao zajednički cilj svih zemalja regiona daje vodeću ulogu Evropskoj Uniji u uspostavljanju i promoviranju regionalne saradnje na Zapadnom Balkanu imajući u vidu širok spektar još uvijek postojećih problema.

Sigurnost i razvoj i dalje predstavljaju dva ključna motiva za uspostavljanje regionalne saradnje i integracije, ali isto tako i multidimenzionalni proces povezivanja u regionu.

Sve zemlje geopolitičkog prostora kojeg imenujemo kao zapadni Balkan su jasno i nedvojbeno opredijeljene za integraciju u EU, sve vlade ovih zemalja su se obavezale u pravcu tog cilja i provode reforme. Međutim, društva su još uvijek podijeljena po

ključnim pitanjima vezanim za koegzistenciju i integraciju različitih zajednica a u nekim slučajevima i po pitanjima ustavnih reformi.

Bosna i Hercegovina čini velike napore u smislu što veće funkcionalnosti i djelotvornosti institucija koje će biti sposobne da se suoče sa izazovima evropskih integracija.

Uvažene dame i gospodo,

Na kraju, dozvolite mi da istaknem da je petogodišnje postojanje i djelovanje Vijeća za regionalnu saradnju svakako doprinijelo i promoviranju međuljudskih kontakata između zemalja regiona i Evropske unije i ono je danas od ogromne važnosti. Političari bi moraju omogućiti stvaranje pogodnih političkih i ekonomskih uslova kako bi otvorili nove vizije koje će mladim generacijama pružiti šansu za bolji život na ovim prostorima.

Pomoć svih prijatelja Bosne i Hercegovine i prepoznavanje i isticanje pozitivnih koraka koji se u BiH čine na njenom putu ka euroatlanskim integracijama je svakako uvijek dobrodošla. Ne sumnjam da ćete nastaviti pružati podršku BiH, politici koja je vodi i svim njenim građanima.

Nadam se da smo u proteklih pet godina bili dobri domaćini Sekretarijatu RCC-a, te da ćemo karakter našeg tradicionalnog gostoprimstva zadržati i u budućnosti.

Hvala na pažnji!